



S E R M O N

VINGT-QUATRIESME.

ACTES III. VERSET XXI.

*Actes III. Verset XXI. Lequel il faut que le Ciel conuienne iusques au reſta-
blissement de toutes les choses que Dieu a pro-
noncées par la bouche de tous ses Prophetes
dés le commencement du monde.*



omme encore que le So-
leil soit merueilleusement
lumineux, si est ce que
quand il y a des nuages in-
terposés entre son corps
& la veue de l'homme, il
lui est impossible de voir sa face iusques à
ce qu'ils soient écartés : ainsi encore que
nostre Seigneur Iesus Christ le soleil de ju-
stice se reuele fort clairement en la predi-
cation

cation de son Euangile & porte des preuves indubitables de sa diuinité, neantmoins quand les Esprits sont preoccupés d'imaginations erronées, & qui repugnēt directement à ses enseignements, ils ne sauroyent estre bien persuadés de sa verité, s'ils ne sont au prealable desabusés de ses faux prejugés. C'est pourquoy quand les saincts Apostres l'ont annoncé, premierement aux Juifs comme à ceux desquels il estoit descendu selon la chair, & qui deuoient estre plus disposés à le receuoir ayans esté nourris dès l'enfâce dans la Loy & dans les Prophetes; & puis aux Gentils qui estoyent les autres brebis qu'il deuoit recueillir en sa bergerie, & qui encore qu'ils n'eussent pas la lumiere des Escritures auoyent la reuelation de la misericorde de Dieu dans les œuures de la nature & de la Prouidence: ils ne sont pas contentés de leur proposer cette verité tant importante à leur salut, qu'il estoit veritablement le Fils de Dieu & le Sauueur du monde, & de le leur prouuer par l'authorité de ses Escritures, par la splendeur de ses miracles, & par le tesmoignage qu'ils leur ont eux mesmes rendu de sa resurreccion bien-heureuse & de son exaltation dans le Ciel, comme de choses qu'ils auoyent veues de leurs pro-

pres yeux ; mais ont très-soigneusement travaillé à guérir les vns & les autres des imaginations dont ils voyoyent que leurs Esprits estoient le plus travaillés, & qui estoient en plus grand obstacle à leur conuersion, afin que ces nuages estans ostés de deuant leurs yeux, ils peussent contempler sa gloire à face descouuerte, & qu'il n'y eut rien qui les retardast d'en embrasser la foi & la profession. C'est la procedure dont saint Pierre a vsé en ce lieu pour la conuersion de ceux de ses compatriotes qui estoient alors dans le Temple : Car il leur a montré premierement que Iesus Christ estoit le saint, le juste, & le Prince de vie que Dieu leur auoit enuoié du Ciel pour leur salut, qu'il auoit esté liuré pour eux à la mort, comme si ç'eust esté quelque malfaiteur, mais qu'il estoit tres innocent, & auoit esté reconnu pour tel par son propre Iuge, & que ce que cela lui estoit arrivé a esté parce qu'il falloit que les choses que Dieu auoit predites par la bouche de tous ses Prophetes *Que le Christ deuoit souffrir*, fussent accomplies en sa personne ; mais qu'après cela Dieu la ressuscité des morts, dont lui & ses Collegues leur pouuoient rendre vn tres-assuré tesmoignage comme en ayans esté

esté tesmoins oculaires , & qu'en suite il l'a glorifié par ce miracle qu'il venoit de faire en leur presence au Nom de ce grand Redempteur. Ce discours là leur eut bien deu suffire pour reconnoistre leur erreur , & pour se reconcilier avec lui par la foi en son Nom & par vne vraie repentance de leurs pechés , dont ce diuin Apostre leur a dit pour conclusion dans les versets immediatement precedents , *Amandés vous donc & vous conuertissez , afin que vos pechez soient effacez , quand les temps de raffraichissement seront venus de la presence du Seigneur , & qu'il aura enuoie Iesus Christ qui auparauant vous a esté annoncé :* Mais il y auoit deux grands obstacles qui empeschoient que cette salutaire doctrine , & cette sainte remonstrance ne fist l'impression qu'elle deuoit faire dans leurs esprits. L'un estoit qu'ils s'estoient imaginé que le Messie deuoit estre vn Prince conquerât cōme vn Cytus ou vn Alexandre qui viendroit avec vne pōpe & vne magnificence mondaine , qui dresserait vne puissante armée , declareroit la guerre aux Romains & à tous les ennemis de son peuple , & aiant remporté sur eux plusieurs glorieuses victoires le deliureroit de leur tyrannie , & qui apres cela reigneroit

sur eux comme vn vrai Salomon , & les feroit iouir d'vne profonde paix & de toutes les delices du monde : Et au lieu de cela (disent ils) nous auons veu venir ce Iesus duquel vous nous parles en vn estat abject & contemptible , n'ayant pour suite, pour escorte, & pour toutes armes qu'vne douzaine de pescheurs , sans qu'il ait iamais rien entrepris pour nostre deliurance, ni mesme tesmoigné d'vne seule parole qu'il en eut seulement la volonte. Nous ne l'auons pas veu seulement viure dans la bassesse & languir dans la poureté, nous l'auons veu mourir sur vne Croix en la compagnie de deux brigands, & depuis ce temps là il n'a non plus paru parmi nous que sont les autres hommes depuis qu'vne fois ils sont morts. Vous nous tesmoignés bien qu'il est ressuscité, & nous voions bien vn grand miracle qui a esté, fait en son nom par vostre ministère, mais tant y a que nous ne voions pas sa personne, qu'il nous la face voir & qu'il nous apparaisse en sa gloire, & alors nous croirons en lui, nous nous rangerons volontiers sous ses estendars, & lui rendrons l'honneur, l'obeissance & le seruire que nous saons estre deu au Messie: mais de reconnoître pour nostre liberateur vn

homme

homme qui n'a jamais rien fait pour nostre deliurance, que nous auons veu viure si miserablement, mourir d'une mort si infame, & estre enseveli comme les autres hommes, & qui n'a plus paru depuis parmi nous, ce seroit estre d'une trop facile creance. L'autre difficulté estoit qu'en embrassant Iesus Christ il falloit faire diuorce avec Moysse, & en receuant l'Euangile renoncer à la Loi. **Quoi donc?** disent ils quitterons nous si legerement nostre Legislatteur dont la vocation a esté authorisée par tant de miracles; & renoncerons nous si facilement à vne Loi que nous sauons si certainement estre venue de Dieu qui l'a prononcée lui mesme à nos peres sur la montagne de Sina parmi le son des tonnerres & des trompettes, & serions nous si prompts à croire à ce nouveau Prophete, nous à qui Dieu a si expressement commandé s'il s'eleue quelque Prophete entre nous qui nous veuille detourner du seruire qu'il nous a prescrit en sa Loi, de le lapider comme vn imposteur? Il estoit donc absolument necessaire pour les disposer à recevoir Iesus Christ & son Euangile de leuer l'un & l'autre de ces obstacles, & de les esclaircir sur ces deux prejugés qui embarrassoient leurs Esprits.

C'est ce que fait saint Pierre en la dernière partie de sa remonstration, leur respondant quant au premier, *Qu'il est bien vrai que Iesus Christ ne paroïssoit plus maintenant sur la terre, mais que c'est parce qu'il faut que le Ciel le contienne iusqu'au temps de reſtabliſſement de toutes choses*: Et quant à l'autre que ce Prophete auquel ils font difficulté de croire à cause de l'autorité de Moyse, c'est Moyse mesme qui leur à commandé de l'escouter sur peine d'estre exterminés, ayant dit en termes formels à leurs peres, *le Seigneur vostre Dieu vous suscitara un Prophete d'entre vos freres tel que moi, vous l'escouterés en tout ce qu'il vous dira, & quiendra que toute personne qui n'aura pas escouté ce Prophete là, sera exterminée d'entre le peuple, & que tous les autres Prophetes qui l'ont suiui ont predit ces jours.* Pour le present nous nous arretterons au premier remettans l'autre à l'exposition des versets suiuaus. Nous examinerons donc ici avec l'assistance du Saint Esprit cette sentence de l'Apostre dont vous venés d'entendre la lecture, & pour y proceder par ordre, nous considerons premierement ce que l'Apostre dit, *Qu'il faut que le Ciel conienne nostre Iesus, & puis ce qu'il ajoute Qu'il n'en sortira*
point

point & qu'il ne paroiltra plus sur la terre
iufques au temps du reftabliffement de toutes les choses que Dieu a prononcées par la bouche de tous fes faints Prophetes dès le commencement du monde.

Quant à la demeure de Christ dans le Ciel, faint Pierre en parle comme d'une chose qui devoit necessairement arriver ; *il faut*, dit il , *que le Ciel le recoive.* Où quand il dit que *le Ciel le recoive*, il entend qu'il le contienne , qu'il le loge , qu'il soit sa demeure ordinaire : Autrement à prendre le mot de recevoir en sa signification ordinaire, il eust deu dire , veu qu'il y avoit desia plusieurs iours qu'il y avoit esté receu , non , *il faut que le Ciel le recoive* , mais il falloit que le Ciel le receust , comme parlant d'une chose passée. Outre qu'à parler proprement le Ciel ne l'a receu qu'au moment qu'il y est entré , & ainsi on ne pourroit pas dire qu'il le recoive iufques au temps du reftabliffement ; au lieu que l'on peut fort bien dire que l'ayant receu vne fois il le contient , & le contiendra jufques au iour de la resurrection generale. Voila pour ce qui est des mots : Quant à la chose mesme il avoit fallu que la terre le receust , & lui servit de demeure pour y reueftir la nature humaine , y con-

uerfer entre les hommes, & y faire la satisfaction à la justice de Dieu qui estoit necessaire pour nostre reconciliation avec lui. Car cette satisfaction consistant en la souffrance des tourments & de l'ignominie de la croix, & comme les executions de justice n'ont pas acoustumé de se faire dans les Temples ni dans les palais, mais en des lieux infames destinés à la peine des criminels; il ne falloit pas que ce fust au Ciel qu'il souffrit les tourmens infames de son supplice, mais en la terre qui depuis la cheute de l'homme a esté maudite de Dieu: Aussi fut ce là qu'il souffrit les peines satisfactoires pour nos pechez, & cette douloureuse mort qui nous deuoit donner la vie; mais apres cela il falloit que le Ciel qui est le palais de la diuinité & la demeure de tous les Esprits bien-heureux, fust la residence ordinaire: non seulement parce que Dieu l'auoit ainsi determiné quand il lui auoit dit au Pleaume 110. *Sieds toi à ma dextre iusques à ce que i'aye mis tous tes ennemis pour le marche pied de ses pieds.* Mais parce que comme vous voies que les choses naturelles qui sont transportées hors de leur lieu retournent d'elles memes en leur repos, dès que les causes qui les en retenoient dehors viennent à cesser;

ser; les corps pesants retournans en bas, & les legers en haut: ainsi a-t'il fallu dès que les raisons qui l'arrestoient en terre ont cessé qu'il ait repris son vol vers le Ciel. La dignité de sa personne le requeroit ainsi, car il n'estoit pas conuenable, ni qu'estant Dieu benit Eternellement, il eust vne habitation commune avec les pecheurs & avec les bestes; ni que son humanité ayant acquis par sa resurrection vne vie incorruptible & glorieuse sejournaist plus long temps en vn lieu de corruption & de misere. Où estoit le throsne du pere, là deuoit aussi estre le sien; & il falloit qu'un homme celeste fust logé dans le Ciel pour y estre en sa bien seance. Il estoit le Chef de l'Eglise, & comme la teste est esleuée par dessus tous les membres aussi l'a-t'il deu estre par dessus tous les siens: la teste s'abaisse quelque fois pour l'vtilité de tout le corps, & particulièrement pour subvenir aux parties les plus basses, mais aussi tost elle se redresse vers le Ciel, selon sa condition, & sa constitution naturelle; aussi s'est il bien abaissé en terre pour procurer la redemption de l'Eglise, mais apres cela il a deu reprendre le lieu qui estoit deu à son excellence, & à son autorité souveraine: son'Eglise qui est son corps mysti-

que ayant deux parties, l'une militante, dessus la terre, l'autre triomfante dedans le Ciel; il a fallu qu'il ait exhibé sa preſence & à l'une & à l'autre, à la militante aux jours de ſa chair, & à la triomfante en Reſtar de ſa gloire, & que durant qu'il a mené vne vie baſſe & infirme ſelon la chair, il ait conuerſé avec les fideles qui eſtoient en la meſme condition, & que dès lors que par la reſurreſtion il a eſté reueſtu de gloire & d'incorruption, il ait fait ſa demeure parmi les juſtes & les Eſprits glorifiés. Avec cela la juſtice de Dieu, & toutes ſortes de raiſons vouloyent, que celui qui par vn pur zele de la gloire de Dieu & du ſalut des hommes s'eſtoit abaïſſé iuſques au plus bas degré de l'aneantiffement, fuſt exalté iuſques au plus haut degré de la gloire; que celui qui auoit ſi glorieuſement vaincu le Prince de la puiffance de l'air, & toutes les malices ſpirituelles qui ſont aux lieux ceſteſtes en triomfaſt, & fuſt recuilli au lieu le plus maieſtueux & le plus auguſte de ſon Empire; que celui qui auoit aquis aux hommes par ſon merite le Royaume des Cieux, & reſonçilié tant ce qui eſt aux Cieux que ce qui eſt en la terre, fuſt eſſeué non ſeulement quant à l'authorité à la puiffance, mais auſſi quant à la ſublimité de lieu

lieu au dessus des hommes & des Anges. C'estoit vne recompense qui estoit deue à sa parfaite obeissance ; comme saint Paul le montre quand il dit, *Qu'il s'est an-*
neanti soi mesme & s'est abaissé iusques à la
mort, pour laquelle cause aussi, Dieu l'a souue-
rainement eslé, & lui a donné vn nom qui
est sur tout nom &c. Si nous regardons
aussi à les charges Sacerdotale, Propheti-
que, & Royale, pour les exercer d'une fa-
çon qui fust digne de lui, & de sa condi-
tion glorieuse, il falloit qu'il fust dans le
Ciel. Car, quant au Sacerdoce, comme
anciennement au iour de l'expiation solen-
nelle, ce n'estoit pas assés que le souuerain
Sacrificateur, se tenant en la partie exte-
rieure du Tabernacle y immolast la victi-
me propiciatoire dessus l'autel des holo-
caustes, mais il falloit que passant au tra-
uers du voile qui separoit cette partie ex-
terieur d'avec l'interieur, il entrast dans
le Saint des Saints avec le sang de la victi-
me pour le presenter deuant Dieu, & que
puis apres il reuint au peuple pour lui an-
noncer sa reconciliation avec Dieu ; Ainsi
il ne suffisoit pas que nostre Seigneur Iesus
Christ se fust offert lui mesme sur la terre,
mais il estoit necessaire que passant au tra-
uers des Cieux, comme au trauers d'un ri-

che voile tout parleme d'estoiles d'or , qui
discerne son sanctuaire de là haut, d'avec,
son paruis d'ici bas, il entrast au vrai saint
des saints , où Dieu fait sa residence , non
en son Arche de bois & parmi des Cheru-
bins d'or , mais en sa propre Majesté , &
parmi les vrais Cherubins & Anges de la
gloire , & qu'il y presentast continuelle-
ment deuant Dieu ce sang qu'il auoit res-
pandu pour nostre redemption sur la
Croix , iusques à ce que le nombre de les
eueus estant accompli , il eust à sortir du
sanctuaire de sa gloire au paruis, c'est à dire
du Ciel en terre , pour leur annoncer la
sentence de leur absolution generale , &
pour les recueillir tous à soi au Pa-
lais de sa gloire. Quant à la Prophetie,
il auoit à l'exercer non pas entre les Iuifs
seulement , comme *Ministre de la circon-*
cision , mais entre toutes les nations com-
me souuerain Docteur de tout l'Vniuers ,
& ce par la predication de son Euangile
& par la vertu de son Esprit , lequel pour
cet effect, il deuoit enuoyer premierement
sur les Apostres en forme solénelle, & puis
sur toute son Eglise d'une façon secreete, &
en vne mesure incomparablement plus
grande qu'il n'auoit iamais esté conféré
sous le V. T. Or cela ne se pouuoit faire
qu'il

qu'il ne fust monté dans le Ciel, suivant ce qui est dit, *l'Esprit n'estoit point encore donné parce que Iesus n'estoit pas encore glorifié.* (Jean 7. 39.) Et quant au reign il estoit conuenable, comme c'estoit vn Roi celeste, qu'il eust son throsne dans le Ciel, d'où il donnast les loix à toute la terre, & gouernast toutes choses à son plaisir. Cela estoit enfin necessaire pour purifier nostre deuotion enuers lui, pour fortifier nostre Foi, & pour releuer nostre esperance. Car quelle eust esté nostre deuotion durant la presence de sa chair en terre, sinon charnelle & terrestre, comme a esté celle de ses Apostres, iusques à ce qu'il la conuertit en spirituelle & celeste, en leur ostant sa chair & en leur enuoiant son Esprit? Quelle eust esté la Foi que nous eussions eue de la victoire & de l'acquisition de son immortalité, s'il fust resuscité seulement, & qu'il ne fust pas monté dans le Ciel, le vrai & naturel domicile de l'immortalité; veu que plusieurs sont resuscités qui n'ont pas laissé de mourir encore, & de descendre petit estre dans les Enfers? Quelle eust esté enfin nostre esperance, s'il ne l'eust affermie en emportant nostre nature au Ciel pour lui estre là haut comme vne arche de

N

nous, & en nous enuoyant son Esprit en terre pour nous estre ici bas vno atthe de luy mesme.

Ce sont là les raisons pour lesquelles l'Apôstre dit *Il faut que le Ciel le conserve.* Mais parce que les Juifs auxquels il adresse ce propos, eussent peu dire, si vostre Iesus est monté au Ciel, comme vous l'asseurez; ou s'est pour reuenir en terre, ou s'est pour n'en pas reuenir: S'il ne doit pas en reuenir, il ne restablira pas Israël, & par consequent il n'est pas le Messie dont ce restablissement là doit estre la principale fonction: S'il en doit reuenir, nous attendrons qu'il vienne, & alors nous nous rangerons à son obeïssance. Il leur enseigne qu'il doit veritablement reuenir en terre pour recueillir l'Israël de Dieu qui est son Eglise vniuerselle; mais que ce sera seulement au temps que Dieu a destiné à la restauration generale. *Il faut*, dit il, *que le Ciel le conserve iusques au restablissement de toutes les choses &c.* Il y auoit de merueilleux desordres, & d'horribles confusions dans le monde, & y en deuoit encore auoir de tres-grandes dans les siècles suivans, par l'endurcissement d'une grande partie de la terre. en ses erreurs & en ses vices, par les persecutions que le monde susciteroit

surciteroit contre l'Eglise , par l'introduction de toutes sortes d'heresies dont il souilleroit la pureté de la religion Chrestienne , & enfin par la grande & horrible reuolte qui deuoit arriuer entre les Chrestiens de laquelle le chef, *assauoir l'homme de peché, le fils de perdition s'esleueroit contre tout ce qui est nommé Dieu ou qu'on adore ; iusques à estre assis comme Dieu au Temple de Dieu, se portant comme s'il estoit Dieu , & feroit la guerre au peuple des saincts ; toutes lesquelles choses eussent peu faire douter de la prouidence & de la justice de Dieu , ceux qui ne sauroient pas , ou qui ne considereroient pas comme il faut la fin de ces confusions : Mais il deuoit venir vn temps auquel Dieu iugeroit le monde en justice par l'homme qu'il auoit desermine ; & restablirait toutes choses en vn estat auquel elles demeureroient eternellement pour la manifestation & la gloire de sa sagesse, de sa bonté, de sa verité, & de sa justice. C'est ce temps là que l'Apostre appelle *les temps du restablissement*, & auquel il dit que nostre Sauueur par lequel se doit faire ceste grande ceuvre doit descendre du Ciel. OÙ remarqués qu'il ne dit pas simplement le restablissement des choses, mais le restablissement de toutes les*

choses que Dieu a prononcées par ses Prophetes, parce qu'il y auoit plusieurs choses concernant le reſtaſſement de l'Egliſe qui ſe deuoient accomplir deuant ſa venue, comme la vocation des Gentils, la predication de l'Euangile par toute la terre; les jugemens exemplaires de Dieu ſur les meſchans & ſur les ennemis de ſon peuple; le rafraiſchiſſement & la conſolation des fideles en leurs afflictions; la reformation des abus en la religion; la deſtruction de l'Antechriſt & de ſa tyrannie; l'entrée de la plénitude des nations dans ſon Eglise; la conuerſion finale des Iuiſ; le liement de Satan durant mille ans pour ne pouuoir plus ſeduire les nations, & finalement la victoire que remporteront les fideles ſur Gog & ſur Magog: toutes leſquelles choses ſe doiuent faire les vnes apres les autres durant le cours de pluſieurs ſiècles par la vertu & la diſpenſation du Saint Eſprit auquel Ieſus Chriſt ſ'en allant au Ciel auoit remis le gouvernement de ſon Eglise. Mais ce n'eſt pas en ces choses là que conſiſte le total & dernier reſtaſſement qui ſe doit faire par le Meſſie: car meſme apres cela il y aura encore beaucoup de deſordre dans le monde; il y aura encore beaucoup de pechés

&

& de vices ; les fideles seront suiets à beaucoup d'afflictions , de maladies , de disgraces & enfin à la mort , *estant ordonné à tous hommes de mourir vne fois , & apres cela le iugement* : melme nostre Seigneur Iesus nous declare que *quand il viendra pour iuger le monde à peine trouuera-t'il de la Foi en terre , & que la charité de plusieurs estant raffroidie l'iniquité abondera.* Le grand & parfait retablissement sera lors qu'au son de la trompette de Dieu & de la voix de son Archange tous les morts resusciteront ; que la sentence de condamnation eternelle estant prononcée à tous les meschans, *ils seront precipités en l'estang ardent de feu & de souffre pour y brusler aux siecles des siecles avec le Diable & ses Anges* ; que les esleus de Dieu au contraire estans assemblés en vn par les Anges depuis vn bout des Cieux iusques à l'autre seront mis à la main droite du Souuerain Iuge & orront de sa bouche cette douce inuitation à la gloire de son Royaume, *venez les benits de mon Pere possédez en heritage le Royaume qui vous est preparé deuant la fondation du monde.* Que les creatures mesmes insensibles & inanimées *seront deliurées de la vanité & de la seruitude de corruption à laquelle elles auoient esté assuietties*

(Rom. 8.) par le peché de l'homme, & iouiront (autant que leur nature le peut porter) de la liberté de la gloire des enfans de Dieu; & qu'ainsi toutes choses estans remises en l'estat qu'elles doiuent estre, Dieu sera reconnu tel qu'il est souuerainement bon & iuste, infiniment puissant & parfaitement veritable; & nostre Seigneur Iesus Christ par qui cette œuure admirable se sera faite, glorifié eternellement par les hommes & par les Anges, sainct Luc en cet abbregé qu'il nous fait du sermon de sainct Pierre, ne nous en patle qu'en terme genetaux, sans rien particulariser, mais il ne faut nullement douter que l'Apostre n'en ait fait aux Iuifs vn beaucoup plus long discours, & ne leur ait deduit les choses principales auxquelles ce retablissement consiste.

Mais afin que ces gens charnels, qui par le retablissement que deuoit faire le Messie n'entendoyent qu'vn affranchissement temporel du joug des infideles, l'oians parler d'vn tout autre retablissement, consistant en la resurrection bienheureuse, en l'exaltation de tous les fideles au Ciel & en la beatitude immortelle dont ils y iouiroient, en la damnation de tous leurs ennemis, & au renouvellement merueilleux

ueilleux de toute la machine du monde, ne pensassent que ce ne fust que des choses imaginaires forgées en son Esprit, il leur dit *Que ce sont les choses que Dieu a prononcées par la bouche de tous ses Prophetes dès le commencement du monde; car Dieu a eu dès le commencement ce soin de justifier, par diuers moiens cette prouidence admirable & incomprehensible aux hommes par laquelle il gouerne cet Vniuers mais particulièrement par la reuelation qu'il a faite à ses seruiteurs de toutes les choses illustres qui deuoient arriuer au monde & à l'Eglise, suivant ce qui est dit Amos 3. L'Eternel Dieu ne fera rien qu'il n'ait reuelé son secret à ses seruiteurs Prophetes.* Reuelation qu'il leur a faite expressément afin que quand il prediroit ces choses de viue voix & par escrit, les fideles de leur temps fussent consolés par l'attente des graces qu'il leur promettoit; que les meschans fussent inuités à repentance par la denonciation de ses iugements; que s'ils ne se conuertissoient ils fussent rendus inexcusables quand il viendrait à executer ses iugements; & qu'en fin quand les choses arriueroyent il apparust qu'elles arriuoient par ses ordres, & que sa prouidence & sa iustice en fust glorifiée. Mais

il a esté particulièrement soigneux de pre-
 dire dès le commencement par la bouche
 de ses Prophetes les choses admirables
 qu'il deuoit faire en ce grand & dernier
 retablissement. Ce n'est pas qu'ils en
 ayent parlé si clairement & si distincte-
 ment que Iesus Christ a fait & apres lui ses
 saints Apostres: car la claire reuelation
 des choses qui regardent le Royaume des
 Cieux estoit reseruée au bien heureux
 temps du Nouveau Testament; mais
 ils en ont parlé en termes assés clairs
 pour estre entendus par tous ceux qui
 ont entendu ou leu les Propheties
 avec attention. Ainsi de la resur-
 rection des fideles il est dit Job 19. *Je
 sai que mon Redempteur est viuant & qu'il
 demeurera le dernier sur la terre, & encore
 qu'apres ma peau on au rangé ceci, ie verrai
 Dieu de ma chair, lequel ie verrai & non au-
 tre.* Et au 37. d'Ezechiel la deliurance de
 son peuple captif en Babylone est repre-
 sentée sous l'emblemme de cette resurre-
 ction. Ainsi du jugement que Dieu deuoit
 exercer solennellement contre les impies
 & les meschans, Enoch a dit dès le com-
 mencement, ainsi qu'il est rapporté par saint
 Iude. *Voici le Seigneur vient avec ses saints
 qui sont par millions pour donner jugement*
 contre

contre tous & conuaincre toutes les meschantes paroles qu'ils ont proferées contre lui. Ainsi de la grande restauration & de la souveraine felicité de l'Eglise, il est dit en divers endroits d'Esaié (Esa. 65. 17.) *Je m'en vai créer nouveaux Cieux & nouvelle terre, & les choses precedentes ne seront plus ramentues, & ne reuiendront plus au cœur. Esiousés vous & vous esgaiez à iamais en ce que ie m'en vai créer Ierusalem pour n'estre que ioie, & son peuple pour n'estre que liesse. On n'orra plus parler de violence en son pais ni de degast ni de froissure en tes contrées. (Esa. 60. 18.) Tu n'auras plus le soleil pour la lumiere du iour, & la lueur de la lune ne l'esclairera plus: mais l'Eternel te sera pour lumiere eternelle, & ton Dieu pour ta gloire.* Ainsi de toutes ces choses ensemble il est dit en peu de mots, mais fort Exprés Daniel 12. *Plusieurs de ceux qui dorment en la poussiere de la terre se leueront, les uns en vie eternelle, & les autres en opprobre & en infamie eternelle.* Car encoro qu'il y ait quelques vnes de ces Propheties qui peuuent regarder des restaurations & des deliurances qui se doivent faire en ce monde auant le dernier auenement du Sauueur, neantmoins elles sont conceues en des termes si auantageux & si magnifi-

ques, qu'on n'en voit pas toute la vérité & toute la gloire en cette sorte de deliurances temporelles ou spirituelles qui se font durant cette vie, à cause de la grande imperfection de nostre connoissance & de nostre sanctification, & des grandes tentations, afflictions & persecutions auxquelles les fideles sont ordinairement exposés ici bas : si bien que pour en voir l'entier & parfait accomplissement il faut necessairement aller plus avant, & porter nos Esprits iusques à cette grande journée & à cette generale restauration en laquelle la vérité de ces predicions paroistra en tout son éclat & en toute sa plénitude : Ce sont les choses que saint Pierre entend par ce retablissement dont il parle, & les predicions qu'il dit que Dieu en a faites par ses Prophetes. Or iusques à ce que le temps soit venu que ce retablissement se doit faire, il dit qu'il faut que Iesus Christ demeure dans le Ciel, & qu'il ne paroistra plus sur la terre. Quoi donc veut il dire qu'après cela Iesus Christ ne demeurera plus dans le Ciel? nullement. Non plus que quand Dieu dit à Christ au Pseaume 110. *sieds toi à ma dextre iusques à ce que j'aie mis tes ennemis pour le marchepied de tes pieds*: Et quand saint Paul dit 1. Cor. 15.

Et faut qu'il reigné iusques à ce qu'il ait mis ses ennemis sous ses pieds. Car la gloire de sa personne & la Majesté de son reigné doit durer eternellement. Il faut qu'il soit dans le Ciel, qu'il soit assis à la dextre de Dieu, & qu'il reigné avec lui aux siècles des siècles. Il veut seulement dire que iusques à ce iour glorieux auquel on verra l'accomplissement de tous les oracles anciens, & le bien-heureux renouvellement de l'Eglise & du monde mesme, il demeurera au Ciel où il est sans en bouger, & sans se faire voir en terre, mais que quand le temps de ce reestablishement promis sera arriué, il descondra de là haut pour le faire à la gloire de son grand Nom & à la consolation indicible de ceux qui auront creu en lui & désiré son apparition: au mesme sens qu'il dit à ses Disciples qu'il sera avec eux jusques à la consommation des siècles, non pour dire qu'après cela il n'y sera plus, mais pour les asseurer que lors qu'à cause de sa demeure dans le Ciel il semblera estre fort esloigné d'eux, il les accompagnera tousiours de son Esprit & de sa grace, pour les assister en la conduite & de leur vie & de leur Ministère, & pour remplir leurs cœurs de consolation & de ioie.

Mais c'est assez pour l'exposition de ce texte il est temps de penser a recueillir les beaux enseignements qui nous y sont donnés, tant pour nostre affermissement en la verité contre les erreurs de ce temps, que pour la sanctification de nos vies, & pour la consolation de nos ames. Pour commencer par nostre affermissement contre les erreurs. *Il faut* (dit l'Apostre saint Pierre) *que le Ciel le contienné.* Se peut il rien dire de plus exprés contre l'imagination de ceux qui tiennent que le corps de nostre Seigneur Iesus Christ n'occupe aucun lieu en particulier, mais que par la vertu de son vnion personnelle avec la diuinité, il est vniuersellement par tout. Imagination à laquelle ie pourrois opposer toute l'histoire de l'Euangile qui nous le represente premierement en terre où il a esté conceu au ventre de la Vierge, est né en Bethlehem, a esté nourri à Nazareth, a receu le baptesme au Iordain a esté mené au desert, s'est transporté d'un lieu à vn autre selon les diuerses necessités de sa charge, tantost en Galilée, tantost en Iudée, & tantost en Samarie; a esté cloué en la croix & dévalé dans le sepulchre, & à trois iours de là est ressuscité sortant reellement du tombeau, où les An-
ges

ges attestent aux femmes qu'il n'estoit plus: Et puis nous le décrit au bout de quarante iours quittant la terre & montant au Ciel d'où les Anges tesmoignent *qu'on le verra vn iour descendre comme on lui auoit veu monter.* Toutes lesquelles choses seroient fausses & impossibles si son humanité dès les moment qu'elle a esté vnie à sa diuinité eut rempli vniuersellement tout le monde. Mais ie veux m'arrester à ce texte. Certes saint Pierre n'eust pas dit *Il faut que le Ciel le contienne*, s'il estoit vrai qu'il fust aussi bien dans la terre, dans l'air, dans la mer & dans l'enfer mesme que dans le Ciel. Car de dire que par le Ciel il entend non ce lieu plein de Majesté où Iesus Christ a erigé le throsne de sa gloire, & qu'il a destiné pour le domicile Eternel de ses Anges & de ses saints, mais la condition glorieuse dont il a esté reuestu pour reigner souverainement avec Dieu sur les hommes & sur les Anges, c'est prendre vn mot qui est en mille lieux de l'Escriture sainte en vne signification en laquelle il n'y est iamais pris, & detourner le sens naif des paroies de Iesus Christ & de ses Apostres par des interpretations qui n'ont nul fondement qu'en la fantaisie de leurs Auteurs. Se

peut il rien dire aussi de plus clair contre l'erreur de ceux de la communion de Rome qui veulent que le corps de Christ soit actuellement present par tout où ils celebrent leur Messe? s'il faut que le Ciel le contienne, comment est il possible qu'en vn mesme temps il soit ailleurs? est ce parler de sens rassis de dire qu'un corps est contenu en vn lieu, & qu'il en est dehors en mesme temps? d'ailleurs comment s'accorde leur doctrine avec les propos qu'a tenus nostre Seigneur à ses Disciples ayant égard à son ascension prochaine dans le Ciel, *Vous ne m'aurez pas toujours,* & eux au contraire soutiennent que les Apostres en quelque lieu qu'ils fussent l'auoient tous les iours avec eux par la communion à l'Eucharistie. Il leur disoit *Je laisse le monde & m'en vai au Pere,* & ces gens ci veulent apres cela qu'il soit au monde beaucoup plus que deuant, car alors il n'y estoit qu'en vn lieu, & maintenant ils veulent qu'il soit dans tous leurs Temples par tout le monde, & mesme qu'il soit en terre beaucoup plus qu'au Ciel; parce qu'au Ciel il n'est qu'en vn seul lieu, & sur la terre ils veulent qu'il soit en vne infinité de lieux tout ensemble. Quel desuoyement d'esprit & de discours

discours est celà , de dire qu'un homme laisse un lieu pour aller en un autre , & neantmoins qu'il est beaucoup plus en celui qu'il laisse qu'en celui où il va? Aveugles volontaires iusques à quand fermerés vous les yeux à ces claires lumieres que la parole de Dieu vous presente? Iusques à quand combattrés vous toutes les maximes de la raison? iusques à quand ferés vous la guerre à vos propres sens? si vous n'en voulés croire saint Pierre qui vous dit si expressement *qu'il faut que le Ciel con-*
tienne Iesus Christ iusques au dernier jour & que par consequent il ne le faut plus chercher maintenant sur la terre mais dans le Ciel; Escoutés au moins ce que l'on vous crie en vostre propre Messe *Sursum corda,* esleués vos cœurs en haut? Esleués les, Esleués les là haut où il est à la dextre de Dieu, au lieu de vous arrester ici bas pour le chercher entre les doigts de ceux qui vous trôpent en vous disant qu'il est dedans, qu'il est dehors , dans le Ciel & hors du Ciel tout ensemble.

Mais ie laisse là les aduersaires , priant nostre Sauueur qui a autre fois ouuert les yeux à tant d'aveugles qu'il les veuille encore ouvrir à ceux ci par la vertu de son Esprit & par l'efficace de sa parole , pour

leur faire reconnoître enfin leurs erreurs & la vérité, Et me tourne vers vous *Treschers Freres*, pour vous exhorter à bien mediter ce qui nous est ici enseigné de la demeure du Seigneur Iesus dans le Ciel, afin d'y eleuer vos esprits & d'y adresser tous les desseins & toutes les actions de vostre vie. Souuenés vous, *Fideles*, que Dieu ne vous a pas faits pour la terre mais qu'il vous a créés pour le Ciel; que Iesus Christ vous l'a aquis par le merite de sa mort, qu'il en a pris possession pour nous, qu'il nous y est allé preparer lieu qu'il nous y appelle par son Euangile, & qu'il en doit venir vn jour pour nous y eleuer avec lui. Que là donc soyent tous nos desseins & toutes nos pretensions: que les gens de ce monde *desquels le partage est en cette vie* s'attachent aux biens, aux honneurs & aux commodités de la terre; pour nous nostre partage est au Ciel, c'est là qu'il nous faut attacher nos vœus & nos affections, *pensans aux choses qui sont au Ciel là où Iesus Christ est à la dextre de Dieu; & non point à celles qui sont sur la terre*; nous entretenans durant cette vie des pensées de l'autre; conuersans ici bas comme combourgeois des Anges & domestiques des saints, & taschans d'estre trouués dignes au iour de son

son apparition glorieuse de ce siècle là & de son apparition glorieuse. Mais hélas, comment est ce que nous nous acquittons d'ordinaire de ce religieux devoir ? Cette ambition effrénée qui nous fait courir après les vanités présentes tout de mesme que ceux qui sont *sans esperance & sans Dieu au monde* : Cette avarice insatiable qui nous fait mettre sous les pieds la pieté, la justice & la charité ; pour accumuler les biens de la terre avec autant d'ardeur que ceux à qui la foi n'a jamais proposé ceux du Ciel : Cette concupiscence brutale qui porte tant de meschans Chrestiens à faire *leur Dieu de leur ventre*, comme n'ayans aucune portion en Dieu ni aux delices éternels qui sont en sa dextre ; ne sont ce pas des preuves manifestes que nous ne pensons qu'à la terre, & que nous n'avons de l'affection que pour elle & pour ses avantages ? Ne diroit on pas à nous voir agir que nous sommes tous frappés de la maladie de cette povre femme de l'Euangile qui estoit toujours courbée contre la terre & qui ne pouvoit point elever les yeux vers le Ciel, ou de celle de ces miserables soldats d'Antoine en la guerre contre les Parthes, qui ayans mangé d'une certaine herbe qui faisoit mourir les hommes hors du sens, ne se



soucioyent de chose du monde, mais s'oc-
 cupoyent continuellement à fouiller dans
 la terre, & à remuer d'un lieu à autre tou-
 tes les pierres qu'ils trouuoient, & s'y af-
 fectionnoyent comme à quelque affaire
 bien importante? Car ne nous empessons
 nous pas tout de mesme apres les desseins
 de ce monde, & apres les conuoirises de
 cette vie? Renonçons, Renonçons, *Mes*
Freres, à ces affections terrestres, & pen-
 sons à bon escient à ce haut Ciel où no-
 stre Sauueur fait sa demeure, & aux biens
 de l'Eternité auxquels il nous appelle. Lui
 qui est nostre Chef estant au Ciel à la dex-
 tre de Dieu, nous qui par sa grande miseri-
 corde auons l'honneur d'estre ses mem-
 bres, aurions nous bien le cœur si lasche de
 nous traîner encore sur le ventre & de
 manger la poudre de la terre comme fait le
 serpent à qui Dieu a donné cela pour ma-
 lediction & pour peine? Ah *Mes Freres*,
 gardés vous bien d'estre si miserables & de
 si bas courage; mais plustost avec des af-
 fections genereuses eleués vostre cœur là
 haut ou nous sauons qu'il est monté: *là est*
nostre tresor que là soit aussi nostre cœur. Là
où est le corps, dit nostre Seigneur, là s'assem-
blent les aigles: Ce diuin & glorieux corps
 de la communion duquel depend nostre
 vie

vie & toute nostre felicité est au Ciel: Volons y donc comme de vraies aigles spirituelles pour nous vnir à lui, & en estre nourris à vie Eternelle. Mais on auroit beau nous y exhorter, nous aurions beau nous y efforcer, nous n'y saurions voler de nous mesmes: Il faut que ce soit lui mesme qui nous y tire. *Tire nous donc Seigneur afin que nous courions apres toi, en l'odeur de tes saints parfums, de tes enseignements & de tes promesses, & que nous soions faits vn avec toi maintenant en ta grace, & puis Eternellement en ta gloire.*

Mêlions bien encore cette doctrine pour l'appliquer à la consolation de nos ames: Et puis que nous sauons qu'il fait sa résidence au Ciel, qu'il y comparoit deuant Dieu pour nous, qu'il y intercede sans cesse pour nostre confirmation en la grace & pour nostre salut, assurons nous de la remission de nos pechés, & de nostre reconciliation avec Dieu contre toutes les tentations que Satan & nostre propre chair nous pourroyent liurer à l'encontre, & disons avec son Apôstre, *Qui est ce qui tentera à accusation contre les esleus de Dieu? Dieu est celui qui justifie: Qui sera celui qui condamnera? Christ est celui qui est mort, & qui plus est qui est ressuscité: lequel aussi est à la*

dextre de Dieu, & qui mesmes prie pour nous: Puis que nous sauons aussi qu'il y est allé pour nous preparer le lieu de nostre demeure Eternelle, qu'il a dit à son pere, *Pere mon desir est touchant ceux que tu m'as donné que là où ie suis ils soyent avec moi, afin qu'ils contemplent ma gloire, & qu'il a dit aussi à ses disciples, Ie m'en vai à mon pere & à vostre pere à mon Dieu & à vostre Dieu, ie m'en vai vous preparer lieu, Il y a plusieurs demeurances en sa maison Il n'y en a pas seulement pour moi, il y en a aussi pour vous. Quand ie m'en serai allé, & vous aurai preparé le lieu ie retournerai derechef & vous prendrai à moi, afin que là où ie suis vous soies aussi. Là où ie serai, sera aussi celui qui me sert. Celui qui vaincra ie le ferai seoir avec moi sur mon throsne, comme aussi i'ay vaincu & ie suis assis sur le throsne.* Consolons nous en cette esperance, qu'au sortir de nos corps, nos ames seront recueillies dans son Paradis, & qu'un jour en corps & en ame nous y serons aussi esleués avec lui, le chef attirant tous les membres à la communion de sa gloire. Que cette douce pensée nous assure de la vie au milieu de la mort, afin qu'un chacun de nous puisse dire à ce dernier moment comme disoit saint Paul, *I'ay combattu le bon combat, i'ay achemé la course*

course, j'ay gardé la foi : quant au reste la couronne de iustice m'est reseruée, laquelle le Seigneur iuste iuge me rendra, & non seulement à moi, mais aussi à tous ceux qui ont aimé son apparition : & avec saint Estienne, Te voi les Cieux ouuerts, & le Fils de l'homme estant à la dextre de Dieu. Et puis enfin que nous sauons qu'il doit vn jour descendre de là haut pour accomplir toutes les choses que Dieu a prononcées contre ses ennemis, & en faueur de ses esleus, par la bouche de ses saints Prophetes dès le commencement du monde, & pour restabli toutes choses en bon estat, consolons nous quelque chose qu'il nous arriue, & attendons avec patience le temps qu'il a déterminé pour nostre gloire, assauoir lors que le nombre de nos freres estant accompli, il nous prononcera la sentence de nostre absolution Eternelle deuant les hommes & les Anges, & nous recueillira tous ensemble dans son Royaume celeste. Et si en attendans ce jour de salut nous voions de grands desordres dans le monde; le Nom de nostre grand Dieu blasphemé; sa verité contredite & deshonorée; ses enfans decriés cōme des heretiques & des schismatiques & persecutés avec violence, & les impies au contraire viure bien à leur aise,

214 *Sermon vingt-quatrième.*

dans les avantages, dans les honneurs, & dans les richesses du monde, ne nous troublons point de cela: mais detournons nos pensées des confusions du present siecle qui nous scandalisent, & de ces miseres qui menacent de nous englouir, & les porterons sur ce reſtaſſement general qui ſe doit faire au dernier jour, & nous y trouverons vne conſolation aſſeurée. Aujourdhui le nom de noſtre Sauueur eſt outragé & blaſſémé par les infideles, mais alors tout le monde le verra en ſa gloire, & tremblera en ſa preſence, *Tout œil le verra,* (dit S. Iean) *voire meſme ceux qui l'ont percé, & toutes les tribus de la terre meneront dueil deuant lui.* Aujourdhui l'Eglife de Dieu eſt aſſiſe ſur la ſelleite, & iugée comme criminelle, mais alors elle ſera aſſiſe ſur le thronne, & les ſainctſ jugeront le monde. Aujourdhuy les fideles ſont meſpriſés & deſhonorés par les mondains: mais alors le iuſte ſe trouuera en grande aſſurance deuant la face de ceux qui l'auront tourmenté, leſquels en le voyans ſeront troubles d'horrible crainte, & eſtaiez de le voir ſauué contre leur attente. Alors changeans d'opinion ils diront entr'eux, *Voici ceux deſquels autrefois nous nous rions, & deſquels nous faiſions des proverbes de deſhonneur,*

*Bonneur , nous insensés estimions leur vie estre folie , & leur mort infame , & maintenant comment se fait cela qu'ils sont contez entre les enfans de Dieu , & qu'ils ont leur part entre les saincts. Aujourd huy les profanes & les hypocrites vivent en toute seuereté , & se baignent dans l'aïse & dans les plaisirs de la vie sans aucune apprehension des jugemens de Dieu & des peines que leur impieté merite ; mais alors ils seront tous effraiez & tremblement les saisira , tellement qu'ils diront *Qui est ce d'entre nous qui pourra sejourner avec le feu deuant & avec les ardeurs eternelles ?* Ils n'en auront pas seulement la peur , mais en ressentiront l'effect , estans precipitez à l'heure mesme dans l'abisme de la damnation eternelle ; & en la souffrance intolerable de leurs tourments , reconnoistront enfin , mais trop tard n'y ayant plus lieu à la repentance pour eux *combien c'est chose horrible de tomber entre les mains du Dieu viuant.* Alors enfin toutes les confusions qui sont au monde cesseront pour jamais , & toutes choses seront remises en l'estat que la sagesse , la bonté , la verité & la justice de Dieu requierent qu'elles soient &*

qu'elles demeurent eternellement ; dont
les Anges & les fideles seront ravis &
transportez de ioye , & lui en rendront
tout honneur & gloire &c.

